

Dame i gospodo, dragi IFES prijatelji,

Duboko sam dirnuta. Ovo je momenat o kojem svaki izborni službenik može samo sanjati. Taj momenat je za mene postao stvarnost.

Kroz cijeli radni vijek, bila sam okružena ljudima koji su me ohrabivali da prihvatim nove izazove i zadatke.

Presretna sam da je IFES prepoznao moje dugogodišnje napore da u 26-godišnjem poslu provođenja izbora, učim, stvaram, i pokušavam bolje. Ono što je obilježilo moj radni vijek je puno volontiranja i prenošenja znanja. Upravo to svima preporučujem, jer mi je takav odnos prema radu donio najviše sretnih trenutaka i trenutaka za pamćenje.

Ipak, učila sam od najboljih. Moja IFES porodica me osnažila. Nekoliko osoba kojima dugujem veliku zahvalnost moram izdvojiti: Beverly Hagedon, moja prva šefica ureda u IFES uredu u BIH, 2001. godine, Michael Svetlik, potpredsjednik za programe, Predsjednici IFES-a u dvije posljednje dekade, Richard Soudriette, Bill Sweeney i Antony Banbury. Hvala vam za prijateljstvo i podršku.

Tu su i drage kolege članovi Upravnog odbora sa kojima već devet godina dijelim razmišljanja o tome šta je najbolje za IFES programe u cijelom svijetu. Prije svega se želim svima vama zahvaliti na iskazanom poštovanju koje sve ove godine uživam kao članica ovog tijela. Nadam se da mi moje muške kolege od kojih također učim kako zrelo donositi odluke neće zamjeriti, ali žene članice su moji role modeli. Drage dame IFES-a, vi me inspirišete. Uticale ste na mene svojom energijom, posvećenošću, stalozenošću.

U Centralnoj izbornoj komisiji Bosne i Hercegovine sam godinama obavljala dužnost kao jedina žena od sedam članova. Sada nas je dvije. Biću isto tako sretna ako kolegica Vanja Bjelica Prutina jednom bude mogla reći da sam joj pomogla svojim prenošenjem znanja i iskustva. Zajedno se zalažemo za programske ideje u pogledu jačanja žena i sprečavanja nasilja nad ženama u izbornoj administraciji.

Ko što ste čuli, dolazim iz male zemlje na Zapadnom Balkanu, predivne Bosne i Hercegovine, koja se kontinuirano bori sa svojim izazovima na njenom evropskom putu.

To je zemlja različitosti koje trebaju biti njena najveća snaga.

Činjenica da upravo ja, kao neko ko je po svom porijeklu i opredijeljenju, predstavlja spoj tih različitosti, stojim pred vama i primam ovu nagradu, je najbolji dokaz za to.

Mnogo toga u mojoj zemlji ne bi moglo biti unaprijeđeno bez pomoći međunarodne zajednice. Moja karijera u dvije takve organizacije (OSCE-u i IFES-u) neposredno iza rata u Bosni i Hercegovni je spasila moj život i promijenila moj život. Rad u izbornom procesu je postao moja strast. Imala sam sreću da radim sa ljudima koji su posvećeni demokratskom razvoju.

Niko, osim nas koji smo to iskusili, nije svjestan kako je nakon rata, paralelni proces gradnje pomirenja uz istovremenu gradnju nezavisnih institucija koje trebaju provoditi izbore po najvišim standardima, mukotrpan, dugotrajan i težak.

Međunarodna asistencija u zemljama u tranziciji je evoluirala od prvobitne tehničke i logističke prema mnogo profinjenijim modelima (uključivanje ranjivih grupa, borba za cyber sigurnost i pravovremena procjena rizika koju mogu učiniti npr. netačne informacije). Ove nove prijetnje zahtijevaju globalnu borbu za izborni integritet.

Upravo one utiču na nivo povjerenja u tijela za provedbu izbora i izborni proces u cijelini. Zbog ovakvih prijetnji IFES-ov angažman i angažman organizacija koje rade na istim zadacima je još potrebniji. Ako se se ovim izazovima sistematski ne odupremo, volja birača će biti izigrana i izbori neće imati nikakvog smisla.

Zahvalna sam svim uposlenicima IFES-a širom svijeta koji se zalažu za ove vrijednosti, i koji su prepoznali moje napore i cijenili ih.

Još jednom hvala svima koji su uvijek bili uz mene, mojoj porodici, mojim prijateljima, a posebno kolegama i službenicima Centralne izborne komisije BiH koji su se nesebično zalagali za unapređenje provedbe izbora u BiH.

Nagradu koju primam u trenutku kada IFES slavi 35 godina rada želim posvetiti svakom članu izborne administracije u BiH, s nadom da će im biti inspiracija da dostignu najviše standarde u servisima koje pružaju glasačima.

Hvala vam.